

程侍郎遺集
一



程侍郎遺集
二



程侍郎遺集
三



20051

程侍郎遺集

一

程恩澤著

中華書局

20052

程
侍郎
遺
集

二

程恩澤
著

中
華
書
局

25057

程

侍

郎

遺

集

三

程
墨

中
華
書
局

叢書集成初編

程侍郎遺集 三冊

中華書局出版發行

(北京王府井大街三十六號)

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一

統一書號：一七〇一八·一五一

程春海先生集序

嘉慶九年先生年二十來鄉試江寧始相見讀其詠史詩若干首先君子呼曾亮曰汝見程公子詩乎渠長汝者一歲耳及道光十一年先生來主講鍾山書院相見益親夜過其邢氏寓園月出園中竹石如沐池光盪人面坐水檻中盡讀其所作於別後者而幼聞得名以黃蝶詩及前見者俱不復存矣是時總督陶文毅公政寬簡民吏樂逸多興復湖山寺觀而葆益舟觀察尤好爲主人泛酒船至燕子磯飲絕壁下還過嘉善石壁訪梅花水夾蘿峯飯半山亭聽銅溝水聲循定林寺古道歸以爲常先生及曾亮數人皆其座中客也復至京師爲先生戶部屬官遇我一如其舊山館野寺未嘗不偕偶召賓未嘗不與也有所作必見示時命同作然常十不副一而先生則於詞無所窮其稱情輔意足以射聲叩景如高賢者無所志而不就也丁酉夏忽見語曰吾庭中樹鴉數百夜噪而飛拔巢去此何祥也未幾而病呼余與訣余雖悲猶以爲倘不至若是後十餘日竟卒自先生去江寧其同游者任階平王竹嶼汪均之皆已死而觀察亦歸殯京師羣駟馬之墓側先生往哭甚哀及余與徐蓮峯哭先生去哭觀察時未三四年今蓮峯又亦久死先生之卒已十年矣悲夫戶部尙書祁公以其孫幼孤遺集或散佚屬張石州大令編而校之曾亮不可無一言綴於末也先生平居無時去書其學實事求是而能創獲新義阮相國何子貞編修及石州已詳言之故惟述少長離合南北游處之歎以見略勢分而篤古誼如先生者殆不可多見以誌吾哀至

所作深博雄偉。讀者當自得之。非言詞所能贊也。雖然。先生之異乎流俗者。豈獨其詩文哉。人嘗屬會亮以事而匿其情。漫爲請於先生。覆書曰。吾子而有是言。豈某生平有不見信於深友者乎。不然。則子受紿也。其行已情深而義方。雖他事類如此。傳曰。直諒多聞。古之益友。又曰。夫惟大雅。卓爾不羣。先生殆無愧斯言夫。殆無愧斯言夫。道光二十六年六月。上元梅曾亮譔。

程侍郎遺集初編序

先大父宰歙，徧交其邑之名儒。而戶部侍郎春海程公之考蘭翹學士，以童子從父後，肄業斗山亭，特爲大父賞拔。學士家極寒，大父召入署，躬督教之，衣食視諸子不數年，諸經注疏皆精熟，爲文灌漑精粹，試必冠曹。舉乾隆丁酉拔貢，入成均，連擢巍科，儼直內廷，聲望斐然，顧艱於嗣，晚乃誕公。公丰儀玉暎，父母珍若連城，七歲就傅，每日讀書不過二時，而寒燠晦霾，氣候失和，皆輟課。曹顧厓少宰，大父庚寅分校南闈，所得士也。時官侍講，先君子從之遊，與學士同邸，每抱持公，問以書，不能荅，則徧檢奧僻不經之字相詰難，蓋好奇不羣，幼性爾也。比學士卒於山東學政任所，高宗純皇帝特簡歙人之官清要者，俾往經紀其喪，因以少宰嗣司校事。少宰延先君子同往，至則爲庀其行篋，握公手，送之登車。年十有一矣，已而先君子會試入都，見學士舊僕，訊以門戶近況，則言公子發憤力學，入邑庠，大被宗師賞異，出應試，小賦名雋，綺麗，歎爲絕倫。逮乙丑再赴禮部試，公亦偕計吏來京師，風雅淹博，蜚下共推爲才子。又越七年，遂與先君子同舉進士，入翰林，公嘗贈穆詩曰：君祖授我嚴，獎誨若子姓。君嚴我同譜，欣契挫其敬。蓋實錄云：公負奇氣，博觀強誦，於經訓、史策、天象、地輿、金石、書畫、壬遁、太乙、脈經、格學，莫不窮極要眇，究析發皇之，而精神所到，卓絕岸異，必然可傳於後者，則其有韻詩文也。詩初好溫李，年長學厚，則昌黎山谷，兼有其勝。又際會清宴，無金革流離之事，傷其耳目，故形之篇詠者，率排慕妥帖，力健聲宏，琅琅乎若鸞鳳之嘯。


於穹霄也。穆於癸巳之春。初。侍公直園。情好之治。久愈摯。不三五日。必召過飲。投巾振袂。談議交錯。寒士之被禮者。殆無與比。嘗請公自訂其詩。公曰。吾詩險而未夷。能飛揚而不能黯淡。思力所及者。腕每苦其不隨。更讀書十年。殆可相質邪。嗚呼。執意所業之遂止於斯歟。丁酉夏。穆將歸應鄉試。行有日矣。公置酒相餞。漏過午。拳拳不放別。乃穆甫出都門。公遽感暑疾。久不瘳。祁淳父尙書日往省之。沈頓之頃。尙以穆試事爲念。遺言乞儀徵相國銘其墓。而尙書書之。次年。穆將南游。迂道入京師。哭公。公子德威以遺稿相授。塗乙潦艸。首尾多不完。或篇題殘挽。乙酉以前之作。竟無一字存。疑公尙有清本。藏之別笥。德威未檢獲也。謀更事。搜采成完帙。荏苒未遑。而德威又以措交庫款。赴粵東。卒於劉仲寅觀察署中。觀察名最昌。公視學貴州所拔貢生。公歿後。所以矜恤其家者。有加。德威卒。命其弟送柩返歛。買山營壙。并葬公及金夫人兩世三棺。其孤孫嫠婦之寄寓京師者。則祁尙書爲經營擁樹之。觀察又議以幼女妻德威之子。而娶其女爲己子婦。迎公全家入黔。相依以久。嗚呼。師恩友誼。人有同情。當公賓客填咽之時。詎知身後巨卿。乃此兩人哉。穆幼聞先君子之所以稱公者長。而公之相待。略如大父之待其先德。知己之感。永永弗諼也。今年春。尙書謀刻其遺集。曰。以此爲初編。續有哀錄。補梓易耳。穆既恐殘斷之稿。并歸薶落。又懲夫嫁名僞譏者之厚誣公也。乃偕公門人何編修紹基。排比爲賦一卷。詩四卷。又凡稿艸之失題者。及詩餘試帖。共爲一卷。碑志哀誄駢儷雜著之文五卷。總題曰程侍郎遺集。而敘其緣起如此。以酬公知。兼志余痛云。道光二十有五年。端蒙大荒落。三月既望。平定張穆序。

誥授榮祿大夫戶部右侍郎兼管錢法堂事務春海程公墓志銘

公諱恩澤字雲芬號春海程氏東晉時有爲新安太守者居篁墩又遷歙南代有隱德曾祖筠祖步矩郡生員父昌期乾隆庚子進士第三人及第上書房行走翰林院侍講學士母項氏總兵穆木女公幼穎異毀齒經傳皆成誦尤好讀古書遇疑意必考問釋然而後快鄉先達曹文敏公金輔之先生皆語學士曰此子逾冠所學不可量矣乾隆六十年學士卒於山東學政任公甫十一歲哀毀力學及長補學生員益博綜經史從外祖學騎射能挽強弓最後乃從凌仲子先生遊及其闢輿先生曰天人並至博而能精將來所成者大也嘉慶甲子鄉試中式舉人居京師益勤於學天算地志六書訓詁金石皆精究之辛未會試中式殿試二甲改翰林院庶吉士散館授編修道光元年命在南書房行走召諭曰汝父蘭翹先生品學朕昔年最敬汝之聲名朕亦皆知宜更守素行今戶部侍郎祁公寯藻同召見親聆聖訓出語同朝皆榮之旋奉敕校刻養正書屋集是年充四川正主考二年補春坊中允校刻御製詩文初集三年放貴州學政補翰林院侍講轉侍讀五年補春坊右庶子冬補侍講學士次年調湖南學政回京詔充春秋左傳纂修官補國子監祭酒九年項太夫人卒丁憂歸歙十一年起服入京仍在南書房行走十二年以候補祭酒未與考差特放廣東正主考十二月命在上書房行走課惠親王學王敬禮師傳出于至誠講學爲詩古文書法皆日有進甚相益上與王論公爲人有和而不同之目十三年超擢內閣學士兼禮部侍郎

冬充文淵閣直閣事十四年授工部右侍郎兼管錢法堂十五年會試知貢舉調戶部右侍郎管錢法堂充殿試讀卷官閏六月諭程恩澤部務較繁著無庸在上書房行走十六年復充殿試讀卷官十七年充經筵講官夏受暑醫逾月病愈深遽以七月二十九日卒明日遺疏入上嗟嘆悼惜久之諭曰程恩澤由翰林洊升卿貳前在南書房上書房行走有年人甚謹飭辦理部務克盡厥職近因感受暑溼賞假調理方冀速就痊癒益資委任茲聞溘逝殊堪軫惜伊子程德威著加恩賞給舉人服闋後准其一體會試公學識超於時俗六藝九流皆好學深思心知其意本工篆法益熟精漢許氏文字之學官貴州學政時與布政司吳榮光勸士民育粟蠶其利大行於民又重刻岳珂五經以訓士及奉詔刻春秋左氏傳與祁公共議推本賈服不專守杜氏一家之學平日好士說士技若己有典試廣東期取實學之士知曾釗之名必欲得之釗久丁憂公不知也書榜大失望然所得佳士亦甚多出闈後與學海堂學長吳蘭修等遊白雲山名士會者數十人有蒲澗賞秋之圖所著述惟國策地名考二十卷已寫定本其餘多未成書實不自料其遽折詩文雄深博雅稿亦盈篋其孤方治喪待錄成卷帙就有學者擇之當成佳集公又多藏書宋元以來子史雜錄博覽強記金石書畫亦多考訂苟有叩者必舉以應元入京與公居相近尙以暇相講習元偶校毛詩有椒其馨椒字詛本是馥字其詛久在六朝罕可相語者持以示公公獨深會其意謂詩苾芬孝祀韓詩作馥芬孝祀馥字毛韓兩見形聲不謬於六書爲加一證公又謂近人治算由九章以通四元可謂發明絕學而儀器則罕有傳者乃與鄭君復光有修復古儀器之約又嘗深究開元占經謂

道光十五年木火同度。當有火災。人驗其言而避之。吉地案發。因水之故。曹文正問公。古有之乎。公曰。水鬻王季墓。見棺之前。和呂覽載其事。所撰國策地名考。如謂孟津在河北。非今孟津縣。亦非古河陽縣。蒲反非舜都。乃衛蒲邑。以嘗入秦。仍歸。故謂之蒲反。諸條皆確不可易。公之歿也。年僅五十有三。朝野皆悼惜之。金夫人以道光元年卒。二年。繼娶劉夫人。孫一名新寵。公於元例。稱門人。且仲子先生爲吾友。學術相契。因爲之志銘曰。公之爲人。和而不同。厓岸內峻。德氣外沖。兩世內廷。在位靖共。聲名品學。守之惟公。公學之大。啓於凌氏。約禮博文。實事求是。研究經義。及於子史。卽以其學。望之於士。嗚呼。天命限公。不祿。帝諭飾終。賞延世篤。遺書未定。集之可讀。我鐫此銘。永貞宰木。



程侍郎遺集初編卷一

柎賦并序

激懷園食筍齋後土阜有嘉樹三居者過者皆罔識其名予初亦嘗焉繼綜其華實枝葉審諦之定爲北山之柎按柎兩見詩一見周禮一見爾雅屢見山海經詩毛傳云柎櫨也卽用爾雅文疏云葉似杏而尖白色皮正赤按木皮少正赤者恐是子正赤之訛爲木多曲少直枝葉茂好二月中葉疏華如棟而細蕊正白正名曰萬歲或謂之牛筋或謂之櫨材可爲弓弩幹也郭注雅云似棣細葉材中車輞關西呼柎子一名土櫨其注山海經從同同說文作櫨別有櫨乃櫨也三輔黃圖曰枌詣晉宮闕名曰萬年樹太平御覽同皆柎也而本草經及李氏綱目不載豈以其非藥味歟廣雅埤雅爾雅翼亦不載審此柎非難識之物自三代以來書屢見則無古今之異西都南都皆賦之則無南北之殊然自宋以後著錄漸少豈非顯隱有時人與物忽不相值耶遂作賦曰

有物於此蔭於堂背其枝羽喬而句其榮釵析以碎曼理文身若錯繒綺而被繪畫也子有棖而方一裹一縣四核一房生青繫纍孰赤煌煌將零坼苞若蓋重囊臣愚不識敢詢園場或僥言於側曰此夫蔕侶棟而素纖者歟葉侶杏而益纖者歟萬歲之名聞者頌者所意悅者歟共汲之山華林之園枌詣之宮周秦漢以來所具瞻者歟或揉車輞致遠而利往或奠弓幹揚武而捍患有虬其條琅然振風有倩其景月

宵瓏璫。膏一世而匙知。則不相尋於斧鑿外。多曲而委蛇。棍剛柔而積中。願託根於魁父之邱。思指名之洵洵。故夫梓以爲羣。棣以爲友。檀以爲偶。聞諸北山樵者之口。夫是之謂柎也。

南邨耦耕圖賦并序

鄧子湘泉。與其兄子振。顯鵬齊名。友愛至篤。子振不欲其弟爲知縣。畫聽雨圖以寄。蓋取坡公慎勿苦戀高官職詩意。湘皋亦作耦耕圖以見志。乃爲賦之。其詞曰。
客飢阻以旅餐兮。干通侯而東南。晡汚萊而不歸兮。又軼道乎長安。資嫗髭而索納兮。還髣髴而阻之思。孟晉以治羣兮。或差誰而取之。出卽脫乎簿尉兮。又奚棄乎令長。視己事以志墨兮。定物遂而民向。文豹欲潔其羽毛兮。宣鶴亦厲其高響。安能以身之察察兮。試紫水之滄泱。惆悵而私自憐兮。委銀艾若泥塗。吾將老於耕垆兮。吾將息乎詩書。矧吾仲之清羸兮。託長鑱以爲命。考豐年之瓦盆兮。有倡于而無和聽。天屬旣畀予有兄兮。獨奈何其舍旃。前曜靈已虛擲兮。後俄景其益遄。累別緒而成疾兮。況家紛之世離。予不從仲以歌舞兮。仲日邁其難支。朝三圭而夕萬鍾兮。予不以易此耽樂也。丹吾穀而覆公餗兮。予又安知其以市惡也。莽無垠兮天宇。修駕鸞兮來下。仲有書兮促歸。感淮雨兮資之澍。圖蒼茫兮雨浪浪。書不盡言兮圖之詳。季發緘以喟喟兮。探予心而鑄辭。緬舊盟於合耦兮。夢已接乎東菑。乞丹青以抒懷兮。聚伯亞於冷風之圻。仲發緘亦當喟喟兮。胡與予心若相期。系曰。季才俊兮。適慎進兮。仲知命兮。季益信兮。返井通兮。耦兩翁兮。在南邨之宮兮。